

AUASS KA UTIKUMIT

Etuat Rich

Mishta-utikumu ne auass, mishta-mitshetinua utikuma.

Nasht apu tshi nipaniti utauia tekushinniti eshpish utikumit ne auass.

— Tshe nakatak^u mak au tshikuss, tshe nakatat mak au tshikussin, iteu.

Tshe tshitshipitshuak^u nete ek^u tshe nakatat tshikussin. Tanite tshipa tshi nita tshi nipauanan nenua

etashiniti utikuma (eka ma ui atishkamutinieshapanua enuet

umatshunishiminua). Ek^u tshe nakatat, iteu (tanite apishissishinua).

— Eshe, iteu ne ishkueu.

Ek^u tapue tshatshipitshit tshietshishepaushinit ne ishkueu.

Menaik uitsh, ek^u apu minat nenua utauassima umatshunishiminua tapue.

— Nika, peta ek^u nimatshunishima, iteu. Shash nishikatshinatak.

— Eka pitama, itiku. Pitama nika tshishi-tamatshin, patush tshe minitan, tshe uetashpititan. Tshe takutapin nutapanit, tshe tshishipitshiak^u, itiku.

— Eshe, iteu ne auass.

Ma, tapue tshashi-tamatshiniti ukauia, ek^u :

— Nikuss, nika kutshipiten pitama nutapan, itiku.

— Eshe, iteu ne auass.

— Ek^u tshe natitan, itiku. Nete nika natshipiten nutapan, netehe ek^u tshe natitan, ek^u tshe uetashpititan.

— Eshe, iteu ne auass.

Uetshipitak tapue ishkieu nenu uutapan³. Nete apu shashapakunakanit, ekute nete eishitapet nenu uutapan, tshatshitapepatuat.

— Nika, ka-tshinakashinaua au ! Tshinakashin ek^u ! iteu.

At nashaeu (tanite shikatshu ne auass, apu umassinit ne)... — Nika, shakatshian ek^u ! iteu.

— Mauat, usham tshutikumin, tshinakatitin, itiku. Apu tshika tshi minu- apitshitan ek^u. Eukuan eshit nana tshutai.

Ek^u miat ne auass, tshaeapatat, kau nenu tshitinam^u matukapinu tanite apu kunak nene. Tshetinak nenu, uminauianisha ashpakupishu, pishkuteietshishu nenua. Ek^u miat, ek^u eshpish mat...

Pietuat tshek Mishtapeu auennua anite mianiti. Niatat, pessish ekue natat anite. Uiapamat ek^u umushuma.

— Nika, nika, iteu ne auass, auen ninatik^u, auen ninatik^u !

Ekue natikut (tanite mishta-aiashikueu).

— Nussim, tshikau an euenut ua nakatishk, itiku. Tan etin nussim uet nakatikauin ?

— « Tshutikumin », nitik^u nikau, iteu. Eukuannu uet nakashit.

— Tan, uinapakan a an etin nussim, ne uetikumin ? iteu. Mate anutshish nika nipaiauut tshitikumat.

Ekue tshishunikut (tanite upiuaunua nenua umushuma) ekue anikut, utehe aniku. Ek^u enutikumatikut, nutim mannenua utikuma.

— Nussim, iteu, peik^u tshitshinakush nika ishkunau mak ikuss mak nusheik^u mak peik^u napeik^u. Neu nika ishkunashat muk^u.

— Eshe, itiku.

³ Uin nenu uutapan.

— Atut tshi tshi kuetu takuannu, iteu, anishinnuat anite inniutai, miatshi-tshishikanapitai ma, ek^u tshe nutikumatishuht mani. Eukuannua tshe papakutshikuaht matshi-tshishikanapitai innuat, eka ka tshi natautai, iteu.

— Eshe, itiku.

— Eku natuapamatau tshikau, iteu katshi nutikumatat (shash utakussinu tanite).

Ekue tshitutamat ussima. Apu mitimeuat nenu umeshkanaminu, nete at eitutamat.

Ek^u ne auass uiapamat mani kakua ekushiniti, usht nenu tutaku.

— Nimushum, iteu, kak^u ne ka-akushiua !

— Eka apatenim, ekue itat mani ne Mishtapeu (tanite apu muat nenua).

Nete nasht at utakussinit, uiapamaht kakussa.

— Nimushum, iteu, eukuan ne kakuss, nahi ka-akushiua.

— Eshe, nika nipaiau ek^u, nussim, itiku. Nika nipaiau, tshe mut utakussiniti.

— Eshe, iteu.

Uetamuat nenua kakussa ne Mishtapeu. Kuetuet ek^u. Puputateu mani ek^u meshishtiniti nenua ussima. Ekue ashamat nenua kakua.

— Nimushum, itiku, mitshishu kie tshin !

— Mauat, nussim, iteu, atut tshitshi minu-apatshiauau at muk kak^u. Anite apishish ashami, unishkat anat ashami.

Ek^u tapue eshamat nenua unishkakua, eukuannu eshpish mitshishushit muk^u ne Mishtapeu.

— Eukuan ne tshe ishpish muk, iteu. At ne uitshitan nussimish, atut tshi tshi mueuat innuat, anishinnuat inniutau.

— Eshe, itiku.

Ek^u matshishut uin ne auass.

Uiapannit...

— Ek^u tshe tshitutamitan nussim, itiku, ek^u natatau tshikau.

— Eshe, iteu.

Puputateu ussima, tapue shash mishishtinua. Uiutimeu, eukua (tanite mishishtu ne uin Mishtapeu), uiutimeu nenua ussima. Ekue nataht nete (tanite uapatamueuat nenu uitshinu, mitshetinannu anite) ekue natamuaht, apu uanenitamuaht nenu uitshinu nasht.

— Matshi ma nussim, pitutshe, iteu.

Ekue pitutepatat ne auass. « Nikuss ka-takushinua », iteu ne ishkueu.

— Auen au pieshushk nikuss ? iteu.

— Nimushum nipeshuk^u, iteu.

— Auen ek^u tshimushum ? itiku.

— Anite apu tshipishkuat, iteu.

Shiatshuapit ne ishkueu. Auennua nenua apinua, mishta-mishishtinua innua !

— Auennua nenua ek^u eshinakushiniti pieshukut ? iteu. Tshetutat Mishtapeu :

— Tshin an euenuin, iteu, nekatat tshitauassim. Tshakuan etenimat an uet nakatat tshitauassim ?

Apu tshitutat ne ishkueu, kushtatshimiku. Ek^u iteu umushuma (kau tshitineu nenua umushuma, mishta-shatshieu tanite) :

— Nimushum, iteu, pitutshe (tanite mishishtinua) !

— Tanite nipa tshi tshi pitutshen, itiku, eka nipitutetishaukua tshikau ?

Ek^u iteu :

— « Tshika pitutsheu », uitamu, « tshika nushkaikanitshuapitshen anite kueshte » ek^u tshe uitshimitan.

— Eshe, itiku.

Patutepatat ne auass.

— Nushkaikanitshuapitshe anite, nimushum tshika apipan, iteu.

— Tan tshipa tshi ek^u tshi tepananan an eshpishtit tshimushum ? itiku.

— Tshipa tshi kanapua.

Ek^u iteu ne Mishtapeu :

— Tan ma nipa tshi ishpishtin, pitutsheiani mitshuapit ? Nika apishissishin tshi pitutsheiani mitshuapit.

— Eshe, itiku.

Enushkaikanitshuapitshepanit ne ishkuue. Katshi nushkaikanitshuapitsheniti, ek^u patutshet itakanu ne Mishtapeu ek^u epishissishit, miam innu eukuan eshpishtishit.

Patutshet, ek^u uapemat ussima (mishta-shatshiku tanite). Kie apu nita unuit ne Mishtapeu katshi pitutshet, apu nita unuit, eukuan ne auass muk^u.

— Nussim, iteu, nipaietak tshutau atikua (tshissenimeu kassinu eitiniti auennua). Ma ekuana keutauat, ma tapue !

Miam nenu uineu tan tat^u nipaianiti mani atikua. Tshek nenua ussima nanitam puputateu tepishkaniti, tshek ekue mishishtiniti. Tshek tshi uitsheuenua nenua utauinua.

— Nika uitsheuakue mak au nutau, iteu.

— Eshe, itiku umushuma, uitsheume.
— Nimushum, iteu, tshekuan tshe aputuatan nipaikaniti atik^u ?
— Nussim, tshekuan tshipa aputun : upana mak ushkun, iteu. Eukuan tshe ishi-aputuin, nussim, nipaikaniti atik^u.

Tapue ka itashumikut nenua umushuma tshessitutak nepaiakanniti atikua (tanite papeuemiku nenua umushuma mani netauti). Ek^u nepataht mani tshekuannu, utauia uatsheuati. Nepaiataui atikua, ushkuna mak upana eukuannua eshi-aputuat umushuma.

Ek^u eshpish peshkuat tat (tanite apu nita atapit ne tshishennu), itenimeu tshek eshpish peshkuat uitshimat ek^u innua : « Tshima tshi mitshishimuht atimuat, ka-mishta-kushtatshuti itiht. » Apu minekash tapue, metshishimuht atimuat, mishta-kushtatshuat, tshitishimuat mani, anite tshipishkuat itishimuat mani. Ek^u kueshtatshiht anitshenat ishkieuat nekatakaniht. Ek^u itenimeu ne ishkieu : « Tanite ne tshipa tshi nita tshi tshishennu nenu itenitam^u. Ma ne tshi apatishitakue, tshipa natuapameu nenua atimua metshishimuniti. » Eukuannu ka natutak Mishtapeu tshetshi itakanit. « Nika natuapamau », iteu.

— Kassinu tshipetatin ne etenimin, iteu. Shuk^u tshe ui tshimueuit nussim, nika natuapamauat anitshenat metshishimuht atimuat, iteu.

Ekue unuit. Katshi unuit ne Mishtapeu ekue tshimueht anitshenat atimuat, apu mitshishimuht. Ekue tshitutet ne.

Tekushinit nana auass...

— Nimushum, iteu, nipaikanu atik^u. Nipetan upana mak ushkun.
Apu tshitutikut umushuma. Patutepatat.
— Nika, iteu, tanite nana nimushum ?

— Tshitutepan nana, unuipan nana, itiku. Mitshishimunipani anite atimua, ek^u apu nita eshk^u pitutshet.

Nete uashkapatau nenu neme eshpish itamunit meshkananu, niate uet itutenikueni umushuma. Metitshipanishtuat umushuma. Ekute ekue tshissenimat nenua ussima metitshipanishtakut, shash ekue tshissenimat.

— Nimushum, itiku, ashuapami ! Ashuapami nimushum !

Ek^u tshek eshuapamat tshe ishpish shaputuetutuat ek^u ussima (tanite shatshieu tshitshue). Ashuapameu napaut.

— Nimushum, itiku, tshekuan uet tshitutein ?

— Nitshituten tanite tshikau natamik^u nitaitik^u, iteu. Mitshishimunua atimua ekue ishit ne tshikau : « Ma nana tshishennu tshi apatishitakue, tshipa natuapameu nenua atimua metshishimuniti », nitik^u. Ek^u uenuiuk kanapua ek^u tshatuteian. Atut niminuatik^u anite etauk, nititenimau tshikau uet ishit nenu, iteu.

— Mauat nimushum, itiku.

At ui tshituteu...

— Mauat nimushum, itiku, eka tshitute. Tshiuetau !

— Mauat nussim, apu tshika tshi tshieueian, iteu. Apu ishinakuak nanitam tshetshi uitshimitikut, nussim. Nika ui tipan au tan, apu nita uitshimak innu. Enush tshuitshimitinau, iteu.

— Mauat nimushum, itiku, tshiuetau !

— Mauat nussim, apu tshika tshi tshieueian, iteu.

— Mauat, tshiuetau ! itiku.

Uetinat ussima ekue upinat ekue putatat, tshauemanniti niate kanapua. Anite tshipishkuat piatshishinit uitshuat, pitutepanu nete uitshuat. Muk^u pashikushipatau ne auass ekue unuipatat niate minuat. Ma ! Apu tsheshtipitikut utauia.

Ekua minuat uenuit, niashauat minuat umushuma. Ek^u tshessenimat niatikut minuat ussima. « Mauat nika tshi tutuau nussim tapue », itenimeu, « kie apu tshi uitshimak. » Eshuapamat ek^u minuat, shaputuetutueu (tanite petueu pet pietuetaminiti).

— Nimushum, itiku, tshiuetau kie tshika uitshimitin nin, nimushum.

— Mauat, iteu, atut tshitshi aitin eitian. Apu nita mitshishuian au nin, ek^u tshin tshimitshishun.

— Eshe. Eku utin tshiuetau ! itiku.

— Mauat, apu tshika ut tshieian nussim, tanite natamik^u nitaitik^u tshikau, iteu. Minuat eukuan nipa itik^u tshessinat at uitshimitan.

— Mauat nimushum, itiku, tshiuetau !

— Mauat, iteu.

Ekue utinat ussima, minuat ekue putatat. Ekue tshiepanit ne auass nete kau. Muk^u pitutepanu nana auass.

Kau minuat ekue unuit, tshatshipatat minuat. Ek^u kuetu tutueu ussima. « Tanite nipa tutuau nussim, nipa ut tshi eka nashak^u ? » itenimeu. Uetinak ashininu, puputatam^u, anite eshtat umeshkanamit, anite tshipishkamueu umeshkanaminu, ashit puputatam^u nenu. Nutim nete ashiniushekanu kie niate. Ek^u nene ka-ituteua, natiku nenua ishpimit, nenu anite tshissekat. Apu tshi itutet ne auass, ekute anite pepamutet, miat. Shash nakatiku nanani, apu tshi uitshimikut.

Ek^u tshauet ne auass, apu tshi aitim tanite nenu e tshissekanit.

Eukua niate uet uapateu umushuma nete eituteniti. Apu tshi tutak nenu. Tshauet ek^u.

Natshi-nipinenanu

Ek^u miat, apu nita tshimuet kiashikaniti, tepishkaniti apu nita tshimuet, mau, mau, kie apu utin aimit nasht at ua aimiakaniti, muk^u mau. Tshék niataht anitshenat tshishennuat. « Tanite tshipa tutuakanu tshipa ut tshi tshimueu ne auass ? » iteuat. Ekue nataht anitshenat tshishennuat, mishta-mitshetuat tshishennuat niataht.

— Tshékuan tshipa minueniten tutakauin ? itakanu (apu nita aimit tanite).

Ek^u nenu e mat itituakanu :

— Nipin-pineshishat pepimutakuatakau, eukuan muk^u nipa ut tshi tshimuen, itituakanu nenu uti ma⁴.

— Natshi-nipinek^u ! itakanuat.

Apu nita tat anite ne nipin-pineshish, nanitam anite pipun.

— Eku tshitshipaitutau ! itakanuat.

Atik^u mak Maikan eukuanat tshe nikanipaituht.

— Kak^u, ma tshuitshetshen tshin ?

— Nuitshetshen, nika uitshetshen, nitshisheuatishin kie nin, tan nipa tshi eka uitshetshen ? iu.

— Nitshik^u, ma tshika uitshetshen tshin ?

— Eshe, nika uitshetshen.

Utshek mak Maikan mak Atik^u, eukuanat anitshenat tsheshipaniht, eukuanat anat nakaniteht.

Tapue tshatshipaitunanut anite. Ek^u apu takuak tshékuan tshe nimaunanut.

⁴ Mekuati miat.

— Amishk^u anite tau, itakanu. Upimimu an. Eukuan tshe natak^u, eukuan tshe nimaunitak^u piminu.

Tshetinanait tapue, patukuakanit.

— Ma tshitshi minnan tshetshi nimauatshaiat pimi ? itakanu. Nasht apu tshi tshimueitshit anite auass, anite nitshinat tau, iteuat anitshenat innuat. Apu tshi tshimueitshit, nanitam mau. Ninatshi-nipinenan, nipina natuenimeu, pineshisha, nipin-pineshisha, iteuat.

Ek^u itakanu ne Nitshik^u, pet tshe utitakanit ne pessish :

— Eka uin ushinu. Puepuetshitu uesh an pakuaiki upimim, itakanu. Eka uin ushinu.

— E ma tshessinat tshika ushinueu. Tshishat kukuanatshinatau, itakanu ne Nitshik^u (mishta-uitshi-papu, itakanu).

Ek^u kuekuanatshinanait ne Nitshik^u, ek^u apu tshi papit.

— Ekuan, ekuan ek^u, iteu, shashian ek^u ! Ekuan, ekuan shashian, mashian ! etat mani.

Ek^u epunikut, nasht apu tshi papit tshek. Ek^u epuniakanit. Ek^u niatikuakanit ek^u ne ka upimimit, niatikuaht :

— Ma tshui minnan pimi ? itakanu. Nasht apu tshi tshimueitshit anite auass, anite tau, nipin-pineshisha natuenimeu. Ninatshi-nipinenan.

Apu minuenitak, nenu tshitapatam^u. Ekue pikuaik nenu upimim ne. Tatipanashtau nenu upimim, nenu tshe ishpush ashamat nenua etashiniti, mitshetutenua tapue. Puepuetshitu nene, nenu eitit, kassinu nenu eitit puepuetshitu. Apu tshi inishatak ek^u Nitshik^u tshitshue. Tshek ekue ushinuat. Kau ekue napuetshinaminiti nenu upimiminu. Ek^u meshkamakanit nenu upimim. Ek^u tshatshipatuannut ekue matinuemituht nete. Ekue tshitshipaituht katshi aitiht.

Ek^u pieshuapamaht, uet upaut Shesheshu tapue tepishkanit.

— SHE-SHE-SHE-SHE, itueu. Nika uitamuauat uenipinimiht, iteu.

— Shesheshu, itakanu, ashtamite ! Tshika aimitinan.

Ekue natat.

— Ma tauat ute pessish nipinat ? iteu.

— Eshe, itiku, tauat ute, pessish ute. Shash ute pessu anite etaht. Mamu anite tanakanuat, shaputuanit anite etanakaniht.

— Eshe, iteu.

— Tshika ueshitinan, itakanu.

Nasht tshinussunenakanu, nenu ushkush ueueshtakannu, nasht tshinuashkuanikannu nenu ushkush.

— Eukuan tshe ishinakushin, itakanu, anite, ne tshissun.

— Eshe, iteu. Tshinashkumitinau katshi ueshiek^u.

Ekue tshituteht tapue, ek^u napinnit nete eshpish taht, napinnit nete eituteht. Pemishkat tshek Utshashk^u.

— Ma uin tshi uapameu nenua nipina, itakanu ne Utshashk^u.

Tiepuatakanit :

— U-tshashk^u ! U-tshashk^u !

Ekua kuetaupaniut. Ekue tshitinakanit ekue shatshishkuet minuat. « Nipetuatakat auenitshenat. Nika uitamuauat uenipinimiht », iteu. Tshika nataitshimeshu niate.

— Utshashk^u, itakanu, ma tshui mupimen ? Ma tshuitshishten pimi ?

— Eshe nuitshishten, iteu.

— Ashtamite ! Tshika ashamitinan pimi, itakanu.

Eshitshimet anite, eshamakanit nenu piminu (tanite shash

tshi mitshu shiship-piminu, tshipa tshi a eka uitshishtam^u piminu). Emupimet ek^u.

Katshi mupimet ek^u tepatshimut :

— Ne nimiranu tepishkati, iteu, eshakumitipishkua nimiranu. Ek^u utehe ne shaputuan eshinakuak, tetaut anite, aitu nete akutakanuat, pishkuekapitakanuat, eukuanat anat nipinat. Ek^u muk^u ashtuenikanu mani, nimiranuti. Ek^u katshi tshishi-nimiranuti, minuat ekue uashtenikanit, akua auen tshetshi shatshuapit anite ut. Kassinu uashtenikatakanu anite ishpimit, ek^u eka etati auen, minuat ekue nimiranut mani, iteu.

— Ek^u tshietshishepaushiti tan etinanut ? iteuat.

— Neme ka-upataka, iteu, ekute nete uet mushauaik mani Mush, uet tashkamaik. Ek^u neuauakanit ne Mush, kassinu napeuat pushipanuak, ek^u apu tat auen, muk^u nipinat eshkunakaniht, iteu.

— Eshe. Shuka tipatshimu ! itakanu.

Minuat ekue ashamakanit mani piminu eshpish tipatshimut (tanite uitshishtam^u nenu piminu tshitshue).

— Tshe ui tutamin ne etashumitat, itakanu.

— Nete ka-upataka nika ashtanan pashkutshitak^u, iteu ne peik^u, ek^u nasht ne nashipetimit nika ashtanan, ek^u tshe tshitutain tshetshishepaushiti, iteu.

— Eshe, itiku.

— Kie uta tshe pepekatutamin, iteuat, mak apuiat tshe nanatuakamatau tshekat, itakanu.

— Eshe, itiku.

Pitutsheu (ekute anite nepat tanite, anite ma tshipishkuat, ekute nepat). Shash ekue pashuat nenua etaniti.

— Utshashk^u ma, itakanu, tan ishi-mitshishutshe ka-ui pimiutishua ?

— Tshitshue anite uitshitishuat, nimishkuauat anite ushk-atimussat, iteu, mishta-papashuekateshuat. Eukuan an uet ishimakushian, mishta-pashuekateshuat anitshenat ushk-atimussat. Eukuanat anat emukau, iteu.

Ek^u nepanannut, emushauaik minuat tapue. Nianatuakamat apuia ek^u — tshekat nanatuakameu — mak pepekutatam^u nenua uta. Ek^u tshekat uiapannit ek^u nete eshitshimet, upanu anite. Shash nenu aieshkushtakannu nenu upashkutshitakum tshe mushauautat ek^u.

Uiapannit emushauautat ek^u. Uenuishiht kukuminassat tshietshishepaushinit, uiapamaht auennua pemishkaniti. Auennua, Musha pemishkaniti au shash ! Pemishkaniti Musha !

— Mush pemishkat ! issishueshuat anitshenat kukuminassat.

Uenuipaitunannut ek^u, pushipanuut ututuaua. Kutakat nanatuapiteuat upuiuaa, kutakat anat kutaupanuut. Tshetinakannit uitshuau. Ekue tatushakannit anite ekutshiniht anitshenat nipinat. Ekue pashkapeshuakaniht ekue tshitshipatuht. Tiepueshiht minuat nutsheshat, kukuminassat :

— Meshkamikauek^u tshinipinimauat ! iteuat.

Niatakamaihk, niatakamaipaniht passe, passe tshi natakamaimuat ek^u passe kutaupanuut. Natakamaimuat, pakashimuat. Katshi kapaht tapue, ek^u niashauakaniht. Tshatshipaituht ek^u. Auen au, Kak^u etimutet !

— Ue peik^u tshieshtipitak^u ! itakanu.

Uepuepanishtamakanu, tshek ka tuuanishit ek^u etishkuakanit.

— Eukuan tshe ishinakushit, itakanu. « Kak^u » tshika ishinikatikaun, itakanu.

Ek^u anitshenat minuat niashauakaniht. Auen au etamipatat, Nitshik^u ! Nitshik^u etamipatat ek^u ! Tshetinakanit ek^u. Tatakussepaaitunanu anite (mishta-

mitshetinua tanite), tatakussepaaitunanu nenu eshpatat, papatshishkuakanu.

Tshek

ka-papatshishiua ekue itishkuakanit ne Nitshik^u. Itakanu Utshek :

— Utshek, tshin ma uautamitakanitsheme tsheshipanin !

— Eshe, iteu.

Nete kuiashkuepaniut mishtikut, ekute ekushit.

— A-a ume, itakanu, eukuan au ka tshishipanit etimak^u !

At ui pmutakuateuat, mauat.

— Tshin, itakanu Atikamekush (Atikamekush eukuan meniiputak, itakanu),
pimutakuash !

A-a-a tapue ueuenauat.

— Nika uauieshi-pimutakuatau, iteu. Nika atushuanauau.

Pemutakuatat tapue, natuaimueu nenu ushuinu. Ekue kuashkuepaniuniti,
nete ishpimit akutshinnua.

— « Mishta-utshekatak^u » tshika ishinikashu ek^u, itakanu.

Minuat tshatshipaituht ek^u, apu nita tshi atimaht ek^u. Ek^u tshek nete
shashkan, tshek nete nipin. Shiatshuatshipaitutai, shash uet mamatshipakannit
anitshenat niashamuahat nenua nipin-pineshisha. Shash nete shatshipakana
nenua shakaua, ushkuaia.

— Ekuan ma ek^u, itakanuat. Eka nutshitamuatau ma ekush, iteuat.

— « Muk^u tshika mamamishkutshipanu nipin » itatanuat⁵, iteu

Atikamekush.

Tiepuataht.

⁵ Itatauat.

— Ekuan eshpa, iteu. Apu tshika ut nutshitamatat nipanat. Muk^u mishkut tshika mamamishkutshipanu nipin.

— Eshe, itiku Maikana kie nenua Atikua, eshe, itiku. Eukuan tapue tshe it. Ek^u tshaueht tapue. Nete ma shiatshuatshipaitunanut ne shipu, nenu auass etat, ekute kuekunakupitakaniht anitshenat nipin-pineshishat. Uiapannit kassinu anite tatuetishuat anitshenat nipin-pineshishat.

Ek^u uekashkukuakanit ne auass, ekue minakanit nenua ukashkua, ekue tshitutet niate. Pepimutakuatat nenua nipin-pineshisha, eukuannu tshemuet ek^u. Tshék ekue nipaishit peik^u (ne « kautauassikunishkueunishit » ka-ishinikatakanua) ekue pakunat. Pakunetshueshu ekue pushtishkuashit nenua, nenu ushakanu. Katshi pushtishkuat ekue nakatak nenua umatshunishima anite kassinu nene eitapashtat. Ekute anite ekushishit. Ek^u eshpish tat, netuapamakanit, uniakanu nana auass. Ek^u uapatakannua nenua umatshunishima, kie eukuan eshpish uapatakanit anite. Uapatakannua nenua umatshunishima anite eshteniti, mennamukue.

Ek^u ne nipin-pineshish, kautauassikunishkueunishit, ekute anite ekushishit pessish anite.

— Ushtuin eukuan ne, itakanu. Eukuan kanapua enuet tshe ishinakushit. Eukuan ui ishinakushitshe, iteuat anitshenat tshishennuat. Ek^u tshika uinakanu ne pineshish « kautauassikunishkueunishit » tshika ishinikashu mishkut ne auass. Eukuannitsheni epushtishkakut ne auass, itakanu.

Ekuana eshkuapetshishit.

